


ALAHADY 3 KAREMY - TAONA D 2025



« Indro efa telo taona izay no tonga nitady voa amin'ity aviavy ity aho »

Ry Kristianina havana, raha tamin'ny Alahady lasa teo, Alahady faharoa amin'ny karemy dia ny fiovan'ny Tompo tarehy no nobanjinintsika. Manoro antsika sahady izay miandry antsika vokatry ny Paka izay fandalovana amin'ny fiainana tsizarizary, fahafatesana vokatry ny fahotana izay manapotika ny fiainana ka mitondra antsika amin'ny fitsanganan-ko velona miaraka amin'I Jesoa. Miaraka mitsangana Aminy isika ka miditra amin'ny fiainam-baovao, izany no dikan'ny fiovan-tarehy. Sady fankaherezana ho an'ireo mpianatra hamakivaky an'ilay fijalian'I Jesoa no fanambarana ny fiainana miandry raha miara-maty amin'i Kristy amin'ny fahotana isika ka miara-mitsangana Aminy amin'ny fiainam-baovao. Niainantsika izany nandritra ny herinandro faharoan'ny karemy iny amin'izao andro fibebahana izao.

Vakiteny I : Eks. 3, 1-8a. 13-15
Tononkira : Salamo 102
Vakiteny II : 1 Kôr. 10, 1-6. 10-12
Evanjely : Lk. 13, 1-9

Amin'izao Alahady fahatelon'ny karemy izao kosa dia ambaran'ireo vakiteny fa tsy ho tanteraka na oviana no oviana izany fiovam-penitra antenaintsika sy andrandraintsika ka

hahatonga antsika EOV (Eglizy Olona Velona) manorina ETA (Eglizy Tranon'Andriamanitra), ho taranaka mpanorina izany, ho Mpivahinin'ny Fanantenana, ho Tabernakla velona ary amin'izao Sinaody faha-7 fijanonana faha-3 hahatonga ho EOV VITA BATEMY MIARA-DIA MANDRAY AN-TANANA ZARY MISIONERA TABERNAKLA VELONA MAMAFY HAFALIANA, FIADANANA, FIHAVANANA SADY KRISTIANINA NO MALAGASY. Aoka hazava ny resaka tsy tanteraka izany raha tsy mibebaka isika. Izany indrindra ny tanjon'izao Sinaody izao. Tsy ho tanteraka ilay Paka andrandraintsika amin'izao taona 2025 izao raha tsy mibebaka isika, miala amin'ny fahotana manapotika ny fiainana hoy ny Papa. Ho Paka hitondra fihavaozana tokoa ho antsika amin'ny fiainana andavanandro, amin'ny fiainam-pianakaviana, amin'ny fiainan'ny Eglizy fiombonana, amin'ny Eglizy fototra, Eglizy iraka, izao Paka vaovao izao ka entintsika hanorenana tontolom-piainana vaovao hahatonga antsika hanana fivelarana amin'ny tontolo iainantsika sy amin'ny tontolom-pinoana.

Miantso antsika hibebaka ary hiova tokoa ny Eglizy amin'izao Alahady fahatelo izao ka maniraka antsika tahaka ny nanirahany an'I Moizy, maniraka ny Eglizy, maniraka ny mpaminany, maniraka antsika tsirairay hanambara ny fibebahana amin'ireo manodidina antsika. Tahaka an'i Moizy izay antsoin'Andriamanitra sy nirahiny hanambara ny fibebahana tamin'ny vahoakany sy ny ejipsianina. Izany no miandry antsika amin'izao fotoana izao.

“Esory ny kapa amin'ny tongotrao fa tany masina eto” ny tiana ambara amin'izany dia isika hiova, hiala amin'ny fiainantsika tsizarizary manapotika ny tontolo iainantsika amin'ny alalan'ny fandroana amin'ny motro sy tevy ala. Tsy maintsy esorintsika tahaka ny kapantsika izany koa ny fiainantsika ny lainga, ny fitapitaka, ny risoriso sy ny herisetra, ireny famonoana ny tontolom-piainantsika ka havaozintsika satria tany masina ny fiainantsika satria ain'Andriamanitra ka tsy azo vonoina na oviana na oviana. Tsy maintsy esorintsika koa ireo vato misakana tsy hahafahantsika mifandray amintsika samy antsika sy amin'Andriamanitra dia ny avonavona, ny fitiavan-tena, ny fialonana. Izao no fotoana tsara hibebahantsika, ny tarehy ratsy tsy azo ovana fa ny fanahy ratsy azo ovana araky ny fiteny. Amin'izao androntsika izao anefa na dia ny tarehy ratsy aza azo amboarina ka aoka isika hiova ho tsara fa sanatria ho ratsy. Aoka àry ho tahaka ny hafatr'Andriamanitra tamin'i Moizy, hoesorintsika ny ratsy ka hanaraka Azy isika. Toa isika mamerimberina matetika hoe : Ady ny fiainana, tandremo sao diso ady atrehina.... Ny ratsy hoy isika no iadiana... Tahaka izany koa, ny ratsy no esorina fa tsy ny olona...

Ny zava-misy mitranga amin'ny fiainantsika no mahatonga antsika hanontany tena hoe raha famindram-po tokoa Andriamanitra, naninona no nisy izao andro ratsy izao ? maninona no misy ny loza isan-karazany ? maninona no misy ireny zava-mitranga mihoatra lavitra an'izany famindram-pon'Andriamanitra izany ? Ny tenin'I Jesoa ao amin'ny evanjely no mananatra antsika fa ireny zavatra mitranga ireny dia ho entin'Andriamanitra hanampy antsika. Maro no azo hanazavana ireny fa amin'izao Alahady fahatelon'ny karemy izao, ny hafatra nolazain'I

Jesoa ao amin'ny evanjely dia ny mba hanampy antsika hibebaka. "Raha tsy mibebaka ianareo dia ho very ho tahaka azy koa ianareo rehetra."

Ry Kristianina havana, hararaoty izao fotoana izao mba hibebahantsika, handao ny toetra ratsy teo aloha isika ka hanatona ny famindrampon'Andriamanitra, hibebaka ary tsy vitany hibebaka fa hanavao ny fiainantsika tokoa. Izany no dikan'ny pelerinajy ataontsika any amin'ny La montagne ireny mba hibanjinantsika ny lalan'ny hazo fijaliana, ny ezaka ataontsika miakatra mba hiakatra tokoa ny fiainantsika fa tsy hirefarefa amin'ny tany. Izany koa no hamafisin'I Md Paoly ao amin'ny vakiteny faharoa, manamafy fa tsy maintsy handray lesona amin'ny zavatra teo aloha isika mba hanova ny fiainantsika ho fiainana misy an'Andriamanitra. Izany no dikan'ny mibebaka, miova ny fiainana, mampipetraka an'Andriamanitra eo anivon'ny fianantsika. Amin'ny alalany sy miaraka Aminy ary ao Aminy no hanatanterahantsika ny fiainantsika.

Aoka àry hangatahantsika ny fahasoavan'Andriamanitra mba hibebaka isika ka hanova sy hampijoro antsika tokoa, tsy hianjera na dia maro aza ny fakam-panahy mila mandrendrika antsika. Aoka àry hihaino ny fampianaran'ny Eglizy isika tahaka ny nihainoan'ny vahoaka ny fampianaran'I Moizy ary haka lesoka amin'ireo zava-niseho amin'ny fiainantsika isika mba ho fiainana misy an'Andriamanitra ny fiainantsika araky ny hafatry Md Paoly hoe "*nosoratana ny fiainan'ny vahoaka niaraka tamin'I Moizy tany an'efitra ho fampianarana sy fianarana ho antsika.*"

Ry Jesoa Tompo ô, miroso hatrany ny dia mankany amin'ny Paka, izay fandalovana, miala amin'ny fiainana ratsy teo aloha, miala amin'ny fahotana ka ny fahafatesana no faran-tampony amin'izany. Nandresy ny ratsy rehetra lanao ka raha miara-maty Aminao amin'ny fahotana izahay mba hira-hitsangana aminao amin'ny fiainam-baovao amin'ny Paka. Enga anie hibebaka tokoa izahay, havaozy ny fonay mba ho vaovao ka hahay handray Anao. Ataovy mafana fo izahay amin'ny ezaka rehetra ataonay ka hiseho amin'ny fiainanay tokoa izany fibebahana izany.

Ry Jesoa Tompo ô, ataovy matoky mandrakariva ny famindram-ponao izahay ka rehefa miaiky heloka, mifona amin'ny fahalemenay sy ny fahadisoanay dia mba hanana fo vaovao hanampy anay hizotra amin'ny Paka izay andrandrainay hitondra fiainam-baovao ho anay ka hahatonga anay ho EOY sy ETA, ho taranaka mpanorina, mpanorina tontolo iainana, tontolom-piainana izay hanampy anay hiombona ho fianakaviana olo araiky ao Aminao. Hanorina tontolom-pinoana hampiombona anay bebe kokoa Aminao hahatonga anay ho vavolombelona sy ho fanasina ary ho fahazavana eo anivon'izao tontolo izao. Amen

Mompera Arseveka Benjamin Ramaroson